

摘藻堂四庫全書薈要

史部

欽定四庫全書薈要

史部

文獻通考卷二百四十九



詳校官員外郎臣潘紹觀

欽定四庫全書薈要卷九千五百七十

史部

文獻通考卷二百四十九

鄱陽馬端臨貴與著

經籍考七十六

集總集 文史

江西詩派一百三十七卷 續派十三卷

陳氏曰黃山谷而下二十五家又曾絃曾思父子
詩詳見詩集類詩派之說本於呂居仁前輩多有

異論觀者當自得之

漁隱叢話呂居仁近世以詩得名自言傳衣江西
常作宗派圖自豫章以降列陳師道潘大臨謝無
逸洪芻饒節僧祖可徐俯洪朋林敏修洪炎汪革
李錞韓駒李彭鼂冲之江端本楊符謝邁夏倪林
敏功潘大觀何顥王直方僧善權高荷合二十五
人以為法嗣謂其源流皆出豫章也其宗派圖序
數百言大畧云唐自李杜之出焜耀一世後之言

詩者皆莫能及至韓柳孟郊張籍諸人激昂奮厲
終不能與前作者並元和以後至國朝歌詩之作
或傳者多依效舊聞未盡所趣惟豫章始大出而
力振之抑揚反覆盡兼衆體而後學者同作並和
雖體制或異要皆所傳者一予故錄其名字以遺
來者余竊謂山谷自出機杼別成一家清新奇巧
是其所長若言抑揚反覆盡兼衆體則非也元和
至今騷翁墨客代不乏人觀其英辭傑句真能發

明古人不到處卓然成立者甚衆若言多依效舊文未盡所趣又非也所列二十五人其間知名之士有詩卷傳於世為時所稱者止數人而已其餘無聞焉亦濫登其列居仁此圖之作選擇弗精議論不公余是以辯之

後村劉氏總序曰呂紫微作江西宗派自山谷而下凡二十六人內何人表顯潘仲達大觀有姓名而無詩詩存者凡二十四家王直方詩絕少無可

采餘三十三家部帙稍多今取其全篇佳者或一
聯一句可諷詠者或對偶工者各著於編以便觀
覽派中如陳后山彭城人韓子蒼陵陽人潘邠老
黃州人夏均父二林蘄人鼂叔用江子之開封人
李商老南康人祖可京口人高子勉京西人非皆
江西人也同時如曾文清乃贛人又與紫微公以
詩往還而不入派不知紫微去取之意云何惜當
日無人以此叩之後來誠齋出誠得所謂活法所

謂流轉圓美如彈丸者恨紫微公不及見耳派詩
舊本以東萊居后山上非是今以繼宗派庶不失
紫微公初意

輜軒集一卷

張氏曰鄱陽洪皓歷陽張邵新安朱弁使虜得歸
道間唱酬邵為之序

古今絕句三卷

陳氏曰吳說傳朋所書杜子美王介甫詩師禮之

子王令逢原之外孫也

玄真子漁歌碑傳集錄一卷

陳氏曰玄真子漁歌世止傳誦其西塞山前一章而已嘗得其一時唱和諸賢之辭各五章及南卓柳宗元所賦通為若干章因以顏魯公碑述唐書本傳以至近世用其詞入樂府者集為一編以備吳興故事

艇齋師友尺牘二卷

陳氏曰南豐曾季狸裴父之師友往復書簡其子
維輯而刻之自呂居仁徐師川以降下至淳熙乾
道諸賢或在焉裴父蕭然布衣而名流敬愛之若
此足以知其人之賢且見當時風俗之美也

膾炙集一卷

陳氏曰朝請郎嚴煥刻於江陰韓吏部而下雜文
二十餘篇

唐人絕句詩集一百卷

陳氏曰洪邁景盧編七言七十五卷五言六言二十五卷卷各百首凡萬首上之重華宮可謂博矣而多有本朝人詩在其中如李九齡郭震滕白王岳王初之屬其尤不深考者梁何仲言也

後村劉氏曰野處洪公編唐人絕句僅萬首有一家數百首並取不遺者亦有複出者疑其但取唐人文集雜說令人抄類而成書非必有所去取也

唐絕句選五卷

陳氏曰莆田柯夢得東海編所選僅一百六十六首去取其嚴然人之好惡亦隨所見耳

唐絕句選四卷

陳氏曰倉部郎中福清林清之直父以洪氏雜句抄取其佳者七言一千二百八十五言百五十六六言十五首

考德集三卷

陳氏曰強至所集韓魏公薨後時賢祭文挽詩

四家胡笳詞一卷

陳氏曰蔡琰劉商王安石李元白也

選詩七卷

陳氏曰文選中錄出別行以人之時代為次

宏辭總類四十一卷 後集三十五卷 第三集十卷

第四集九卷

陳氏曰起紹聖乙亥迄嘉定戊辰皆刻於建昌軍
學相傳紹興中太守陸時雍所刻前集也餘皆後



人續之戊辰以後時相不喜此科主司務以艱僻之題困試者縱有記憶不遺文采可觀輒復推求小疵以故久無中選者初紹聖設科但曰宏詞不試制誥止於表檄露布戒諭箴銘頌記序九種亦不用古題及大觀改曰詞學兼茂去戒諭及檄而益以制誥亦為九種四題而二題以歷代故事及紹興始名以博學宏詞復益以誥贊檄為十一種三日試六題各一今一古遂為定制

古文關鍵二卷

陳氏曰呂祖謙所取韓柳歐蘇曾諸家文標抹註釋以教初學

迂齋古文標註五卷

陳氏曰宗正寺簿四明樓昉暘叔撰大略如呂氏關鍵而所取自史漢而下至於本朝篇目增多發明尤精學者便之

歷代奏議十卷

陳氏曰呂祖謙集

國朝名臣奏議十卷

陳氏曰呂祖謙集凡二百篇

皇朝名臣奏議一百五十卷

陳氏曰丞相沂國忠定公趙汝愚編進時為蜀帥
自序曰恭惟我宋藝祖開基累聖嗣業深仁厚澤
相傳一道若夫崇建三館增置諫員許給舍以封
還責侍從以獻納復唐轉對之制設漢方正之科

凡以廣聰明容受讜直海涵天覆日新月益得人
之盛高掩前古逮至王安石為相務行新法違衆
自用而患人之莫已從也於是排老成為流俗謂
公論為浮言屏棄忠良一時殆盡自是而後諂諛
之風盛而朋黨之禍起矣臣伏覩建隆以來諸臣
章奏考尋歲月蓋最盛於慶歷元祐之際而漸弊
於熙寧紹聖之時方其盛也朝廷庶事微有過差
則上自公卿大夫下及郡縣小吏皆得盡言極諫

無所違忌其議論不已則至於舉國之士咸出死
力而爭之當是時也豈無不利於言者謂其強聒
取名植黨於朝期以搖動上心然而聖君賢相率
善遇而優容之故其治效卓然士以增氣及其敝
也朝廷有大黜陟大政令至無一人敢議論者縱
或有之其言委曲畏避終無以感悟人主之意而
獻諛者遂以為內外安靜若無一事可言者矣殊
不知禍亂之機發於所伏今尚忍言哉臣仰惟陛

下嘗命館閣儒臣編類國朝文鑑奏疏百五十六篇猶病其太略茲不以臣既愚且陋復許之盡獻其言萬幾餘間特賜紬繹推觀慶歷元祐諸臣其詞直其計從而見效如此熙寧紹聖諸臣其言切其人放逐而致禍如彼然則國家之治亂言路之通塞盖可以鑒矣

續百家詩選二十卷

陳氏曰三衢鄭景龍伯允集以續曾慥前選凡慥

所遺及在慥後者皆取之然其率略尤甚

江湖集九卷

陳氏曰臨安書坊所刻本取中興以來江湖之士以詩馳譽者而方惟深子通承平人物鼂公武子止嘗為從官乃亦在其中其餘亦未免玉石蘭艾混殽雜還然而士之不能自暴白於世者賴此以有傳書坊巧為射利未可以責備也

回文類聚三卷

陳氏曰桑世昌澤卿集以璇璣圖為本初而並及
近世詩詞且以至道御製冠於篇首

送朱壽昌詩三卷

中興藝文志皇朝司農少卿朱壽昌生數歲而母嫁
五十年不相知熙寧初棄官於同州求得之乃屈資
求為蒲中倅士大夫作詩送之

江湖堂詩集一卷

中興藝文志皇朝知洪州元積中詠其居和者數十

人

世綵集三卷

中興藝文志政和中廖剛曾祖母與祖母享年最高
皆及見五世孫剛作堂名世綵以奉之士大夫為作
詩

滁陽慶歷集十卷 後集十卷

陳氏曰朝散郎滁人徐徽仲元集斷自慶歷以來
曾肇子開紹聖中謫守為之序其後集則吳玟張

康朝王彥恭所續宣和四年唐恪欽叟序之末及
紹興蓋又後人續入之爾

吳興詩一卷

陳氏曰熙寧中知湖州孫氏集而不著名以其時
考之孫覺莘老也

吳興分類詩集三十卷

陳氏曰雪川倪祖義子由編大抵以孫氏所集太
畧而增廣之且並及近時諸公之作然亦病於太

詳祖義齊齋之子少俊該洽仕未達年五十以死
會稽掇英集二十卷 續集四十五卷
陳氏曰熙寧中郡守孔延之程師孟相繼纂集其
續集則嘉定中汪綱俾郡人丁燧為之

潤州類集十卷

陳氏曰監潤州倉曹曾旼彥和纂始東漢終南唐
京口詩集十卷 續二卷

陳氏曰鎮江教授熊克集開寶以來詩文本二十

卷止刻其詩又得二卷自南唐而上曾所遺者補八十餘篇

永嘉集三卷 嘉禾詩一卷

陳氏曰並不知集者

天台集二卷 別編一卷 續集三卷

陳氏曰初李庚子長集本朝人詩為二卷未行太守李兼孟達得之又得郡士林師箴所集前代之作為賦二詩二百乃以本朝人詩為續集而併刻

馬別師箴之子表民所補也

栝蒼集三卷 後集五卷 別集四卷

陳氏曰郡人吳飛英陳百朋相繼纂輯

釣臺新集六卷 續集十卷

陳氏曰郡人王塹集續者郡守謝得與子上也

長樂集十四卷

陳氏曰福建提刑吳興俞尚集宣和三年序

清漳集三十卷

陳氏曰通判漳州趙不敵編

揚州詩集二卷

陳氏曰教授馬希孟編元豐四年秦觀作序

少遊序畧曰鮮于公領州事之二年命教授馬君
採諸家之集而次之又搜訪於境內簡編碑板亡
缺之餘凡得古律詩洎箴賦合二百二篇勒為三
卷號揚州集按禹貢淮海惟揚州則江湖之間盡
其地自漢以來既置刺史於是稱揚州者往往指

其刺史所治而已漢以來刺史無常治或歷陽壽
春曲阿合肥建業而江左復以會稽為東揚州自
隋以後始治廣陵此集之作自魏文帝詩而下在
當時雖非揚州而實今之廣陵者皆取之具非廣
陵而當時為揚州者皆不復取云

宣城集三卷

陳氏曰知宣州安平劉涇元符三年序

南州集十卷

陳氏曰太平州教授林楠子長集

南紀集五卷 後集三卷

陳氏曰知漢陽軍于寔教授施士衡編其後集則
教授聲豐也

湘江集三卷

陳氏曰不知何人集湘江者韶州曲江別名

良嶽集一卷

陳氏曰不知集者其首則御製記文也

桃花源集二卷 又二卷

陳氏曰紹聖丙子四明田孳序淳熙庚子縣令趙彥琇重編合為一卷下卷下卷則淳熙以後所續

庾樓紀述三卷 琵琶亭詩一卷 東陽紀詠四卷

陳氏曰俱不知集者

盤洲編二卷

陳氏曰洪丞相适兄弟子姪所賦園池詩也

瓊野錄一卷

陳氏曰學士洪邁園池記述題詠其曰瓊野者從
維揚得瓊花植之而生遂以名圃

清暉閣詩一卷

陳氏曰史正志創閣於金陵僚屬皆賦詩

會稽紀詠六卷

陳氏曰汪綱仲舉帥越多所修剏嚴陵洪漢每事
為一絕賡者四人曰張浸王栴程震龍馮大章又
有諸葛興為古詩二十篇

蕭秋詩集一卷

陳氏曰玉山徐文卿斯遠作蕭秋詩四言九章章四句趙蕃昌甫而下和者十三人紹熙辛亥也趙汝談履常亦與焉後三十三年嘉定癸未乃序而刻之文卿晚第進士未注官而死有詩見江湖集

唐山集一卷 後集三卷

陳氏曰卞園宋欽編唐山者臨安昌化縣也

後典麗賦四十卷

陳氏曰金華唐仲友與政編仲友以詞賦稱於時
此集自唐末以及本朝盛時名公所作皆在焉止
於紹興間有王戊集典麗賦九十三卷故此名後
典麗賦王氏集未見

指南賦箋五十五卷 指南賦經八卷

陳氏曰皆書坊編集時文止於紹熙以前

指南論十六卷 又本前後二集四十六卷

陳氏曰淳熙以前時文

擢犀策一百九十六卷 擢象策一百六十八卷

陳氏曰擢犀者元祐宣政以及建紹初年時文也
擢象則紹興末大抵科舉場屋之文愈降愈下後
生亦不復知前輩之舊作姑存之以觀世事

文章正宗二十卷

陳氏曰參知政事真德秀希元撰自序正宗云者
以後世文詞之多變欲學者識其源流之正也自
昔集錄文章若杜預摯虞諸家往往湮沒不傳今

行於世者惟梁昭明文選姚鉉文粹而已繇今視之二書所錄果得源流之正乎故今所集以明義理切世用為主其體本乎古而指近乎經者然後取焉否則辭雖工亦不錄其目凡四曰辭命曰議論曰叙事曰詩賦去取甚嚴

序辭命曰書之諸篇聖人筆之於經不當與後世文辭同錄獨取春秋內外傳所載周天子諭告諸侯之辭列國往來應對之辭下至兩漢詔冊而止

蓋魏晉以降文辭猥下無復深淳溫厚之指至偶
儻之作興而去古益遠矣學者欲知王言之體當
以書之誥誓命為主而參之以此篇則所謂正
宗者庶可識矣

序議論曰六經語孟聖賢大訓不當與後之作者
同錄而獨取春秋內外傳所載諫爭論說之辭先
漢以後諸臣所上書疏封事之屬以為議論之首
他所纂述或發明義理或敷析治道或褒貶人物

以次而列焉

序叙事曰今於書之諸篇與史之紀傳皆不復錄
獨取左氏史漢叙事之可喜者與後世記序傳誌
之典則簡嚴者以為作文之式若夫有志於史筆
者自當深求春秋大義而參之遷固諸書非此所
能該也

序詩歌曰朱文公嘗言古今之詩凡三變蓋自書
傳所記虞夏以來下及漢魏自為一等自晉宋間

顏謝以後下及唐初自為一等自沈宗以後定著律詩下及今日又為一等然自唐初以前其為詩者固有高下而法猶未變至律詩出而後詩之古法始為大變矣故嘗欲抄取經史諸書所載韻語下及文選古詩以盡乎郭景純陶淵明之作自為一編而附於三百篇楚辭之後以為詩之根本準則又於其下二等之中擇其近於古者各為一編以為之羽翼興衛其不合者則悉去之不使其接

於胸次要使方寸之中無一字世俗語言意思則其為詩不期於高遠而自高遠矣今惟虞夏二歌與三百五篇不錄外自餘皆以文公之言為準而拔其尤者列之此篇律詩雖工亦不得與若箴銘頌贊郊廟樂歌琴操皆詩之屬間亦采摘一二以附其間至於詞賦則有文公集註楚辭後語今亦不錄或曰此編以明義理為主後世之詩其有之乎曰三百五篇之詩其正言義理者無幾而諷詠

之間悠然得其性情之正即所謂義理也後世之作雖未可同日而語然其間寄興高遠讀之使人忘寵辱去鄙吝儼然有自得之趣而於君親臣子大義亦時有發焉其為性情心術之助反有過於他文者蓋不必顯言性命而後為關於義理也讀者以是求之思過半矣

後村劉氏曰文章正宗初蒙西山先生以詩歌一門屬余編類且約以世教民彝為主如仙釋閨情

宮怨之類皆勿取予取漢武帝秋風辭西山曰文中子亦以此詞為悔心之萌豈其然乎意不欲收其嚴如此然所謂携佳人兮不能忘之語蓋指公卿扈從者似非為後宮設凡余所取而西山去之者大半又增入陶詩甚多如三謝之類多不收

右總集

文心雕龍十卷

鼂氏曰晉劉勰撰評自古文章得失別其體製凡

五十篇各係之以贊云余嘗題其後曰世之詞人
刻意文藻讀書多滅裂杜牧之以龍星為真龍王
摩詰以去病為衛青昔人譏之然亦不足怪蓋詩
賦或率爾之作故也今總著書垂世自謂嘗夢執
丹漆器隨仲尼南行其自負亦不淺矣觀其論說
篇論語以前經無論字六韜三論後人追題是殊
不知書有論道經邦之言也其疎畧殊過於王杜
矣

陳氏曰魏後為沙門名慧地

文章緣起一卷

陳氏曰梁太常卿樂安任昉彥昇撰但取秦漢以來不及六經

詩品三卷

陳氏曰梁記室參軍潁川鍾嶸仲偉撰以古今作者為三品而評之上品十一人中品三十九人下品六十九人

金鍼詩格三卷

鼂氏曰唐白居易撰居易自謂與劉禹錫元稹皆以詩知名撮詩之體要為一格病得鍼而愈詩亦猶是也故曰金鍼集

詩格一卷

陳氏曰稱魏文帝而所述詩或在沈約後其為假託明矣

詩格一卷 詩中密旨一卷

陳氏曰唐王昌齡撰

評詩格一卷

陳氏曰唐李嶠撰嶠在昌齡之前而引昌齡詩格
八病亦未然也

二南密旨一篇

陳氏曰唐賈島撰凡十五門恐亦依託

文苑詩格一卷

陳氏曰稱白氏尤非也

詩式五卷 詩議一卷

陳氏曰唐僧皎然撰以十九字括詩之體

風騷指格一卷

陳氏曰唐僧齊己撰

詩格一卷

陳氏曰沙門神或撰

處囊訣一卷

陳氏曰金華僧保暹撰

流類手鑑一卷

陳氏曰僧虛中撰

詩評一卷

陳氏曰桂林僧德淳撰

擬皎然十七字一卷

陳氏曰稱正字王元撰不知何人

炙轂子詩格一卷

陳氏曰唐王叡撰

句圖一卷

陳氏曰唐李洞撰

唐詩主客圖一卷

陳氏曰唐張為撰所謂主者白居易孟雲卿李益
鮑溶孟郊武元衡各有標目餘有升堂及門入室
之殊皆所謂客也近世詩派之詩殆出於此要皆
有未然者

文章玄妙一卷

陳氏曰唐任藩言作詩聲病對偶之類凡世所傳詩格大率相似余嘗書其末云論詩而若此豈復有詩矣唐末詩格汙下其一時名人著論傳後乃爾欲求高尚豈可得哉

修文要訣一卷

鼂氏曰偽蜀馮鑑撰雜論為文體式評其誤謬以訓初學云

緣情手鑑詩格一卷

陳氏曰題樵人李弘宣撰未詳何人當在五代前
詩格要律一卷

陳氏曰進士王夢簡撰

風騷要式一卷

陳氏曰徐衍述亦未詳何人

琉璃堂墨家圖一卷

陳氏曰不著名氏

雅道機要二卷

陳氏曰前卷不知何人後卷稱徐寅撰

詩評一卷

陳氏曰不知何人

御製句圖一卷

陳氏曰太宗皇帝所選楊徽之詩十聯真宗皇帝
所選送劉琮詩八篇

楊氏筆苑句圖一卷 續一卷

陳氏曰黃鑑編蓋楊億大年之所嘗舉者皆時賢

佳句續者不知何人亦大年所書唐人句也所錄
李義山唐彥謙之句為多崑體蓋出二家

惠崇句圖一卷

陳氏曰僧惠崇所作

孔中丞句圖一卷

陳氏曰中丞者或是孔道輔邪

雜句圖一卷

陳氏曰不知何人所集皆本朝人詩也自魏文帝

詩格而下二十七家皆已見吟窻雜詠

續金鍼詩格一卷

晁氏曰梅堯臣聖俞撰聖俞遊廬山宿西林與僧希白談詩因廣樂天所述云

陳氏曰二金鍼大抵皆假託也

吟窻雜詠三十卷

陳氏曰莆田蔡傳撰君謨之孫也取諸家詩格詩評之類集成之又為吟譜凡魏晉而下能詩之人

皆略具本末總為此書麻沙嘗有刻本節略不全
李公詩苑類格三卷

晁氏曰李淑撰寶元三年豫王出閣淑為王子傳
因纂成此書上之述古賢作詩體格總九十目

林和靖摘句圖一卷

陳氏曰林逋詩句

詩三話一卷

陳氏曰無名氏

詩話一卷

鼂氏曰歐陽修永叔撰修退居汝陰戲作此以資談笑

續詩話一卷

鼂氏曰司馬光君實撰序云詩話尚有遺者歐公文章聲名雖不可及然記事一也故敢續之

中山詩話三卷

鼂氏曰劉攽貢父撰多及蘇梅歐石攽以博學名

世如言蕭何未嘗掾功曹亦有誤謬

東坡詩話二卷

鼂氏曰蘇軾號東坡居士雜書有及詩者好事者因集之成二卷

后山詩話二卷

鼂氏曰陳師道無已撰論詩七十餘條

潛溪詩眼一卷

鼂氏曰范溫元實撰溫祖禹之子學詩於黃庭堅

歸叟詩話六卷

鼂氏曰王直方立之撰直方自號歸叟元祐中蘇子瞻及其門下士以盛名居北門東觀直方世居浚儀有別墅在城南殊好事以故諸公亟會其家由是得聞緒言餘論因輯成此書然其間多以已意有所抑揚頗失是非之實宣和末京師書肆刊刻鬻之羣從中以其多記從父詹事公語言得之以呈公公覽之不懌曰皆非我語也

苕溪漁隱曰王直方詩話載鼃以道云說之初見東坡詠梅西江月詞便知道此老須過海只為古今人不曾道到此須罰教去此言鄙俚近於忌人之長幸人之禍直方無識載之詩話寧不畏人之譏誚乎

杜詩刊誤一卷

鼃氏曰皇朝王仲至撰

韓文辨證八卷

鼂氏曰洪興祖討論韓愈詩文推考其根源以訂正其訛謬頗為該博云

韓柳文章譜三卷

鼂氏曰皇朝黃大輿撰大輿之意以為文章有壯老之異故取韓愈柳宗元文章為三譜其一取其詩文中官次年月可考者次第先後著其初晚之異也其一悉取其詩文比叙之其一系列當時君相於上以見二人之出處極為詳悉

天厨禁齋三卷

鼂氏曰釋惠洪撰論諸家詩格

石林詩話二卷

陳氏曰葉夢得撰

續詩話一卷

陳氏曰無名氏

許彥周詩話一卷

陳氏曰襄邑許顗撰

四六談塵一卷

陳氏曰謝伋景思撰

四六話一卷

陳氏曰王銍性之撰

四六餘話一卷

陳氏曰楊困撰未詳何人視前二家為汎雜

艇齋詩話一卷

陳氏曰曾季狸裘父撰



賦門魚鑰十五卷

陳氏曰進士馬偁撰集唐蔣防而下至本朝宋祁
諸家律賦格訣

賓朋宴語三卷

陳氏曰太子中舍致仕貴溪丘昶孟陽撰南唐進
士歸朝宰數邑著此書十五篇叙唐以來詩賦源
流天禧辛酉鄧賀為序

西清詩話三卷

陳氏曰題無名子撰或曰蔡條使其客為之也

環溪詩話一卷

陳氏曰臨川吳沆集

韻語陽秋二十卷

陳氏曰葛立方撰

漁隱叢話六十卷 後集四十卷

陳氏曰新安胡仔元任撰待制舜陟之子居湖州

自號苕溪漁隱



石溪詩話十卷

陳氏曰莆田黃徹常明撰

續廣本事詩五卷

陳氏曰聶奉先撰雖曰廣孟啓之舊其實集詩話耳

山陰詩話一卷

陳氏曰李兼孟達撰

諸家老杜詩評五卷 續一卷

陳氏曰莆田方深道集

選詩句圖一卷

陳氏曰高似孫編

杜詩發揮一卷

陳氏曰金華杜旂仲高撰

觀林詩話一卷

陳氏曰楚東吳律子書撰未詳何人

文說一卷

陳氏曰南城包揚顯道錄朱侍講論文之語

右文史



文獻通考卷二百四十九



總校官庶吉士臣張能照

校對官檢討臣王坦修

謄錄貢生臣王詢

欽定四庫全書會要

史部

文獻通考卷二百五十

詳校官員外郎臣潘紹觀



欽定四庫全書薈要卷九千五百七十一

史部

文獻通考卷二百五十

鄧陽馬端臨貴與著

帝系考一

帝號歷年

黃帝少典之子姓公孫名軒轅生於壽丘神農氏世哀
諸侯相侵伐蚩尤最暴黃帝徵師諸侯擒殺蚩尤諸侯
尊黃帝為天子在位百年崩年百一十歲

帝顓頊高陽黃帝之孫昌意之子繼黃帝為天子在位七十八年崩年九十八歲

帝嚳高辛黃帝之曾孫元囂之孫蟜極之子繼顓頊為天子在位七十年崩年百五歲

帝堯帝嚳之子姓伊祁名放勳帝嚳崩而長子摯代立封堯為唐侯帝摯立不善在位九年唐侯德盛乃禪位於唐侯堯以甲辰即位都平陽號陶唐氏在位七十年薦舜攝政又二十八年崩在位九十八年壽一百一十

八首甲辰盡癸未

帝舜顓頊七世孫瞽瞍之子姓姚氏名重華年三十堯
舉之年五十攝行天子事年五十八堯崩年六十一以
丙戌歲代堯踐帝位都蒲阪號有虞氏三十一年以丁
巳歲禪於禹又八年崩壽一百歲首丙戌盡癸亥

夏禹顓頊之孫鯀之子姓姁氏名文命治水有功舜使
宅百揆年七十三以丁巳歲受舜禪即天子位都平陽
安邑在位二十七年癸未崩壽百歲

啟禹子以甲申嗣位九年壬辰崩

太康啟子以癸巳嗣位二十九年辛酉以盤遊無度為有窮后羿距於河失邦而崩

仲康太康子以壬戌嗣位十三年甲戌崩

帝相仲康子以己亥嗣位二十八年壬寅為羿所弑寒浞殺羿并滅相相之臣靡逃於有鬲氏相之后還於有仍氏生少康至四十一年壬午靡自有鬲氏滅寒浞而立少康

少康相子以壬午滅寒浞嗣立二十二年癸卯崩

帝杼少康子以甲辰嗣立十七年庚申崩

帝槐杼子以辛酉嗣立二十六年丙戌崩

帝芒槐子以丁亥嗣立十八年甲辰崩

帝泄芒子以乙巳嗣立十六年庚申崩

帝不降泄子以辛酉嗣立五十九年己未崩

帝局不降子以庚申嗣立二十一年庚辰崩

帝廑局子以辛巳嗣立二十一年辛丑崩

帝孔甲厘子以壬寅嗣立三十一年壬申崩

帝皐孔甲子以癸酉嗣立十一年癸未崩

帝發皐子以甲申嗣立十九年壬寅崩

帝履癸是為桀以癸卯嗣立五十三年乙未以失道為
殷湯所伐戰於鳴條師敗湯放之南巢夏亡

右夏一十七世共四百五十九年首丁巳盡乙未
內寒浞篡位四十一年

殷湯契之十四世孫姓子氏名履以夏桀之三十五年

丁丑即諸侯位自商丘徙都亳以乙未伐桀滅夏即天子位十三年丁未崩壽百歲

太甲湯孫以戊申嗣立三十三年庚辰崩

沃丁太甲子以辛巳歲嗣立二十九年己酉崩

太庚沃丁弟以庚戌嗣立十五年甲戌崩

小甲太庚子以乙亥嗣立十七年辛卯崩

雍己小甲弟以壬辰嗣立十一年癸卯崩

大戊雍己弟以甲辰嗣立七十五年戊午崩

仲丁大戊子以己未嗣立十三年辛未崩

外壬仲丁弟以壬申嗣立十五年丙戌崩

河亶甲外壬弟以丁亥嗣立九年乙未崩

祖乙河亶甲子以丙申嗣立十九年甲寅崩

祖辛祖乙子以乙卯嗣立十六年庚午崩

沃甲祖辛弟以辛未嗣立二十五年乙未崩

祖丁沃甲兄以丙申嗣立三十二年丁卯崩

南庚沃甲子以戊辰嗣立二十五年壬辰崩

陽甲祖丁子以癸巳嗣立七年己亥崩

盤庚陽甲弟以庚子嗣立二十八年丁卯崩

小辛盤庚弟以戊辰嗣立二十一年戊子崩

小乙小辛弟以己丑嗣立二十八年丙辰崩

武丁小乙子以丁巳嗣立五十九年乙卯崩

祖庚武丁弟以丙辰嗣立七年壬戌崩

祖甲祖庚弟以癸亥嗣立三十三年乙未崩

廩辛祖甲子以丙申嗣立六年辛丑崩

庚丁廩辛弟以壬寅嗣立二十一年壬戌崩

武乙庚丁子以癸亥嗣立四年丙寅崩

太丁武乙子以丁卯嗣立三年己巳崩

帝乙太丁子以庚午嗣立三十七年丙午崩

受辛帝乙子是為紂以丁未嗣立無道三十二年戊寅
周武王伐之戰於牧野師敗受死殷亡

右殷二十八世共六百四十五年首乙未盡戊寅

周武王后稷十六世孫文王之子姓姬氏名發以商紂

二十三年己巳嗣為西伯至己卯勝殷殺受即天子位
七年乙酉崩壽九十三

成王名誦武王子以丙戌嗣立三十七年壬戌崩歲四
十四歲

康王名釗成王子以癸亥嗣立二十六年戊子崩
昭王名瑕康王子以己丑嗣立五十一年己卯崩
穆王名滿昭王子以庚辰嗣立五十五年甲戌崩
共王名繄扈穆王子以乙亥嗣立十二年丙戌崩

懿王名囂共王子以丁亥嗣立二十五年辛亥崩
孝王名辟方共王弟以壬子嗣立十五年丙寅崩
夷王名燹懿王子以丁卯嗣立十六年壬午崩

厲王名胡夷王子以癸未嗣立三十七年無道為國人
所逐出奔周召二伯行政謂之共和十五年癸酉崩於
璫

宣王名靜厲王子以甲戌嗣立四十六年己未崩

幽王名宮湟宣王子以庚申嗣立無道十一年庚午為

犬戎所伐敗死

平王名宜臼幽王子以辛未嗣立五十一年辛酉崩

桓王名林平王孫以壬戌嗣立二十三年甲申崩

莊王名佗桓王子以乙酉嗣立十五年己亥崩

釐王名胡齊莊王子以庚子嗣立五年甲辰崩

惠王名閔釐王子以乙巳嗣立二十五年己巳崩

襄王名鄭惠王子以庚午嗣立三十二年壬寅崩

頃王名壬臣襄王子以癸卯嗣立六年戊申崩

匡王名班頃王子以己酉嗣立六年甲寅崩

定王名瑜匡王弟以乙卯嗣立二十一年乙亥崩

簡王名夷定王子以丙子嗣立十四年己丑崩

靈王名泄心簡王子以庚寅嗣立二十七年丙辰崩

景王名貴靈王子以丁巳嗣立二十五年辛巳崩子猛

立為悼王王子朝殺猛代立晉遂子朝立敬王

敬王名丐景王子以壬午嗣立四十四年乙丑崩

元王名仁敬王子以丙寅嗣立六年辛未崩

貞定王名介元王子以壬申嗣立二十八年己亥崩太子去疾立為哀王王叔襲殺之代立為思王思王以庚子嗣立為其弟少隗所殺

考王名少隗以辛丑嗣立十六年乙卯崩

威烈王名午考王子以丙辰嗣立二十四年己卯崩安王名驕威烈王子以庚辰嗣立二十六年乙巳崩

烈王名喜安王子以丙午嗣立七年壬子崩

顯王名扁烈王弟以癸丑嗣立四十八年庚子崩

慎靚王名定顯王子以辛丑嗣立六年丙午崩

赧王名延慎靚王子以丁未嗣立五十九年乙巳為秦
所攻王奔秦盡獻其邑三十六秦受之是歲王崩周亡
右周三十七世共八百六十七年首己卯盡乙巳
內共和行政十五年 自周亡至秦始皇滅六國
稱皇帝以前首丙午盡己卯共三十四年

秦始皇伯翳之後莊襄王之子母呂不韋姬姓嬴氏名
政以周亡後九年甲寅嗣立為秦王立二十六年庚辰

盡滅六國稱始皇帝後十二年辛卯崩

二世皇帝名胡亥始皇少子以壬辰嗣立三年甲午為
趙高所弑立二世兄子嬰乙未漢高祖入秦子嬰降秦
亡

右秦二世共十五年首庚辰盡甲午

漢太祖高皇帝沛豐邑中陽里人姓劉氏名邦父太公
母媼以秦二世元年壬辰年三十起兵為沛公乙未入
關滅秦為漢王五年己亥滅項籍即皇帝位都長安十

二年丙午崩壽五十三

孝惠皇帝名盈高祖太子母呂后以丁未嗣立時年十七在位七年癸丑崩壽二十四呂太后取後宮子以為帝子立之太后臨朝稱制九年辛酉呂后崩諸呂作亂大臣誅之立文帝

太宗孝文皇帝名恒高祖中子母薄姬年五歲立為代王二十三歲辛酉太尉周勃等迎立為皇帝在位二十三年甲申崩壽四十六

孝景皇帝名啟文帝太子母竇皇后三十二歲乙酉嗣立
在位十六年庚子崩壽四十八

世宗孝武皇帝名徹景帝中子母王美人十六歲嗣立
在位五十四年甲午崩壽七十一

改元十一
建元六 元光六 元朔六 元狩六
元鼎六 元封六 太初四 天漢四

太始四 征和四 後元二

孝昭皇帝名弗陵武帝少子母趙婕妤八歲乙未嗣立
在位十三年丁未崩壽二十二

改元三 始元六 元鳳六 元平一

中宗孝宣皇帝名詢武帝曾孫戾太子孫史皇孫子母
王夫人昭帝崩無嗣大將軍霍光立昌邑王賀賀無道
廢之更立帝時年十八丁未嗣立 在位二十五年壬申
崩壽四十三

改元七 本始四 地節四 元康四 神爵四 五
鳳四 甘露四 黃龍一

高宗孝元皇帝名奭宣帝太子母許皇后年二十七癸
酉嗣立 在位十六年戊子崩壽四十三

改元四 初元五 永光五 建昭五 竟寧一

孝成皇帝名鰲元帝太子母王皇后年二十己丑嗣立
在位二十六年甲寅崩壽四十六

改元七 建始四 河平四 陽朔四 鴻嘉四 永始四 元延四 綏和二

孝哀皇帝名欣元帝庶孫定陶恭王子母丁姬成帝無
子立為太子年二十乙卯嗣立 在位六年庚申崩壽二
十六

改元二 建平四 元壽二

孝平皇帝名衍元帝庶孫中山孝王子母衛姬哀帝崩
無子太皇太后遣使迎立之年九歲辛酉嗣立
在位五年乙丑為王莽所鳩崩壽十四

改元一 元始五

王莽立孺子嬰自為攝皇帝三年至戊辰莽篡位

右西漢十二帝共二百一十四年始乙未盡戊辰
王莽以己巳篡位稱新室十五年癸未為漢兵所
誅淮陽王劉元立二年為赤眉所滅莽元共十六

年

改元四

建國五

天鳳六

地皇三

更始二

東漢世祖光武皇帝名秀南陽人高祖九世孫父南頓
令欽帝以王莽篡位之十四年壬午起兵乙酉即皇帝
位遷都洛陽時年二十九在位三十三年丁巳崩壽六
十二

改元二

建武三十一

中元二

顯宗孝明皇帝名莊光武第四子母陰皇后年三十以

戊午嗣立 在位十八年 乙亥崩 壽四十八

改元一 永平十八

肅宗孝章皇帝 昭烜顯宗第五子 母賈貴人 年十九以
丙子嗣立 在位十四年 戊子崩 壽三十三

改元三 建初八 元和三 章和二

孝和皇帝 名肇 肅宗第四子 母梁貴人 年十歲以己丑
嗣立 在位十七年 乙巳崩 壽二十七

改元二 永元十六 元興一

孝殤皇帝名隆和帝少子生始百日嗣立丙午崩壽二
歲

改元一 延平元

恭宗孝安皇帝名祐肅宗孫父清河孝王母左姬殤帝
崩太后立為孝和皇帝嗣年十三以丁未嗣立在位十
九年乙丑崩壽三十二

改元五 永初七 元初六 永寧一 建光一 延
光四

孝順皇帝名保安帝子母李氏年十一以丙寅嗣立在

位十九年甲申崩壽三十

改元五

永建六

陽嘉四

永和六

漢安二

建

孝冲皇帝名炳順帝子母虞貴人年二歲以乙酉嗣立
一年崩壽三歲

改元一

永嘉元

孝質皇帝名纘肅宗玄孫父渤海孝王母陳夫人冲帝
崩皇太后詔嗣立時年八歲在位一年為梁冀所鴆崩
年九歲

改元一 本初元

孝桓皇帝名志肅宗曾孫父蠡吾侯翼母區氏質帝崩
太后與梁冀迎立之年十五歲以丁亥嗣立在位二十
一年丁未崩壽三十六

改元七 建和三 和平二 元嘉一 永興二 永
壽三 延熹九 永康一

孝靈皇帝名宏肅宗玄孫父解瀆亭侯母董夫人桓帝
崩無子皇太后迎立之時年十二以戊申嗣立在位二
十一年戊辰崩壽三十四

改元四 建寧四

熹平六

光和六

中平六

孝獻皇帝名協靈帝中子母王美人靈帝崩董卓廢少
帝為弘農王立帝年九歲以己巳嗣立 在位三十二年
以庚子禪位於魏後十三年壬子崩壽五十四

改元四

初平四

興平二

建安二十四

延康一

右東漢十二帝共一百九十六年首乙酉盡庚子
蜀漢昭烈皇帝名備涿郡涿縣人景帝子中山靖王勝
之後父弘以建安十九年甲午取蜀二十四年己亥稱

漢中王辛丑即皇帝位三年癸卯崩壽六十三

改元一章武三

後主名禪昭烈帝子年十二以甲辰嗣立在位四十一年為魏所滅

改元四建興十五延熙二十景耀六炎興元

右蜀漢二帝共四十三年首辛丑盡癸未

魏文帝沛國譙人姓曹氏名丕武王太子以庚子受漢禪即皇帝位時年三十三在位七年丙午崩壽四十

改元一 黃初七

明皇帝名叡文帝太子年二十二以丁未嗣立
在位十三年己未崩壽三十五

改元三 太和六 青龍四 景初三

齊王名芳明帝養為子年九歲以庚申嗣立
在位十四年癸酉為司馬師所廢時年二十三

改元二 正始九 嘉平五

高貴鄉公名髦文帝孫東海定王霖子司馬師
既廢齊

王迎立之年十四以甲戌嗣立在位六年己卯以討司馬昭不克遇弒年二十

改元二 正元二 甘露四

陳留王名奐武帝孫燕王宇子司馬昭既弒高貴鄉公迎立之年十五以庚辰嗣立在位五年乙酉禪於晉

改元二 景元四 咸熙二

右魏五帝共四十六年首庚子盡乙酉

吳大帝吳郡富春人姓孫氏名權長沙太守堅之子討

逆將軍策之弟漢末封吳王及魏王丕篡逆權以辛丑
歲稱帝在位三十一年辛未崩壽七十一

改元六

黃武七
太元一

黃龍二
神鳳一

嘉禾六

赤烏十三

會稽王名亮大帝少子以壬申年嗣立在位六年為權
臣孫綝所廢庚辰歲亮以謠言自殺時年十六

改元三

建興二

五鳳二

太平二

景帝名休大帝第六子會稽王亮之兄初封瑯琊王戊
寅歲孫綝廢亮迎而立之在位六年甲申歲崩時年三

十

改元一 永安六

歸命侯名皓大帝之孫太子和之子初封烏程侯景帝崩吳人迎而立之晉咸寧末武帝令將軍王濬等率兵伐之皓戰敗詣軍門請降太康元年徙皓洛陽封歸命侯在位十七年壽四十

改元八 元興一 甘露一 寶鼎一 建衡三 鳳
凰三 天冊一 天璽二 天紀四

右吳四帝共六十年首辛丑盡庚子

晉世祖武皇帝河內溫縣孝敬里人姓司馬氏名炎宣王之孫文王之子以乙酉受魏禪即皇帝位時年二十九在位二十六年庚戌崩壽五十五

改元三

泰始十

咸寧五

泰康十

孝惠皇帝名衷武帝第二子以庚戌嗣立時年三十一在位十七年丙寅崩壽四十八

改元七

永熙一

元康九

永康一

永寧一

太

安二

永興二

光熙一

孝懷皇帝名熾武帝第二十五子惠帝時立為皇太弟

帝崩以丙寅嗣立時年二十三在位五年辛未劉曜石勒兵陷洛陽蒙塵於平陽壬申遇害壽三十

改元一 永嘉五

孝愍皇帝名鄴武帝孫吳孝王晏之子洛陽傾覆奔長安衆推為太子懷帝崩以癸酉即位時年十三在位四年丙子劉曜陷長安丁丑遇害壽十八

改元一 建興四

右西晉四帝共五十二年首乙酉盡丙子

元皇帝名睿宣帝曾孫瑯琊恭王覲之子襲封鎮建鄴
愍帝遇害以丁丑嗣立時年四十一在位六年壬午崩
壽四十七

改元三

建武一

太興四

永昌一

明皇帝名紹元帝太子以癸未嗣立時年二十四在位
三年乙酉崩壽二十七

改元一

太寧三

成皇帝名衍明帝太子以丙戌嗣立時年五歲在位十

七年壬寅崩壽二十二

改元二 咸和九 咸康八

康皇帝名岳成帝母弟以癸卯嗣立時年二十在位二年甲辰崩壽二十二

改元一 建元二

穆皇帝名聃康帝子以乙巳嗣立時年二歲在位十七年辛酉崩壽十九

改元二 永和十二 升平五

哀皇帝名丕成帝子以壬戌嗣立時年二十一在位四年乙丑崩壽二十五

改元二隆和一 興寧三

廢帝名奕哀帝母弟哀帝崩皇太后詔立之以丙寅嗣立時年二十四在位六年辛未桓溫廢之

改元一太和五

簡文皇帝名昱元帝少子封會稽王桓溫既廢海西公迎立之以辛未嗣立時年五十一在位二年壬申崩壽

五十三

改元一 咸安二

孝武皇帝名曜簡文帝子以癸酉嗣立時年十一在位二十四年丙申崩壽三十五

改元二 寧康三 太元二十一

安皇帝名德宗孝武帝長子以丁酉嗣立時年十五在位二十二年戊午崩壽四十一

改元三 隆安五 元興三 義熙十四

恭皇帝名德文安帝母弟以己未嗣立時年三十四在位二年庚申禪位於宋遇害壽三十六

改元一元熙二

右東晉十一帝共一百有四年首丁丑盡庚申

宋高祖武皇帝彭城綏興里人姓劉氏名裕以庚申受晉禪即皇帝位時年五十七在位三年壬戌崩壽六十
改元一永初三

少帝名義符武帝長子以壬戌嗣立時年十七在位二

年癸亥徐羨之等廢弒之壽十九

改元一 景平二

太祖文皇帝名義隆武帝第三子封宜都王少帝廢大臣迎立之以甲子嗣立時年十六在位三十年癸巳為元凶劭所弒壽四十六

改元一 元嘉三十

世祖孝武皇帝名駿文帝第三子封武陵王元凶劭弒逆入討賊以甲午嗣立時年二十四在位十一年甲辰

崩壽三十五

改元二 孝建三 大明八

前廢帝名子業考武帝長子以甲辰嗣立時年十六在位一年荒淫無道遇弑壽十七

改元一 景和元

太宗明皇帝名彧文帝第十一子封淮陽王廢帝遇弑以乙巳嗣立時年二十六在位八年壬子崩壽三十四

改元二 泰始七 泰豫一

後廢帝名昱明帝太子以癸丑嗣立時年二十一在位
四年丁巳以無道遇弒年二十五

改元一

元徽四

順皇帝名準明帝第三子封安成王廢帝殞蕭道成奉
太后令立之以丁巳嗣立在位三年以己未禪於齊遇
害壽十歲

改元一

昇明三

右宋八帝共六十年首庚申盡己未

齊太祖高皇帝東海蘭陵郡人姓蕭名道成以己未歲受宋禪即皇帝位時年五十二在位四年壬戌崩壽五十六

改元一建元四

世祖武皇帝名蹟高帝長子以壬戌嗣立時年四十二在位十二年癸酉崩壽五十四

改元一永明十一

廢帝名昭業武帝長孫立為太孫以癸酉嗣立為西昌

侯鸞廢而弑之二十二歲再立海陵王昭文復廢之

改元二 隆昌 延興

高宗明皇帝名鸞始安貞王道生之子既廢二帝以甲戌嗣立時年四十二在位五年戊寅崩壽四十七

改元二 建武四 永泰一

廢帝名寶卷明帝第二子以己卯嗣立時年十六立三年辛巳無道遇弑壽十九

改元一 永元三

和帝名寶融明帝第八子以辛巳嗣立禪於梁遇害壽
十五

改元一 中興元

右齊六帝共二十二年首己未盡辛巳

梁高祖武皇帝南蘭陵中都里人姓蕭氏名衍以壬午
歲受齊禪時年三十五在位四十八年己巳崩壽八十
三

改元七 天監十八 普通七 大通二 中大通六
大同十一 中大同一 太清三

太宗簡文皇帝名綱武帝第三子昭明太子薨立為太子以己巳嗣立三年辛未侯景廢而弑之壽四十九

改元一大寶三

世祖孝元皇帝名繹武帝第七子封湘東王侯景篡立王僧辯等起兵討誅景以壬申嗣立三位三年甲戌為西魏所滅遇害壽四十七

改元一承聖三

敬皇帝名方智元帝第九子封晉安王魏克江陵陳霸

先等迎立之以乙亥嗣立三位三年丁丑禪於陳遇害
壽十六

改元二 紹泰一 太平二

右梁四帝共五十六年首壬午盡丁丑

陳高祖武皇帝吳興長城下若里人姓陳氏名霸先以
丁丑受梁禪時年五十四在位三年己卯崩壽五十七
改元一 永定三

世祖文皇帝名蒨武帝兄始興昭烈王之長子武帝受

禪為臨川王以庚辰嗣立七年丙戌崩壽四十五

改元二 天嘉六 天康一

廢帝名伯宗文帝長子以丙戌嗣立在位三年戊子安成王頊廢之而自立未幾伯宗崩壽十九

改元一 光太二

高宗宣皇帝名頊始興昭烈王次子以戊子嗣立時年四十在位十三年壬寅崩

改元一 太建十三

後主名叔寶宣帝太子以壬寅嗣立年三十在位七年
己酉隋滅之

改元二 至德四 禎明三

右陳五帝共三十三年首丁丑盡己酉

後魏太祖道武皇帝其先世為代北鮮卑君長姓拓跋
氏名珪以丙戌即代王位郊天改元時晉孝武太元十一年十三

年戊戌取燕即帝位又十二年己酉為拓跋紹所弑壽

三十九

改元四 登國十 皇始二 天興六 天賜四

太宗明元皇帝名嗣道武帝子以己酉嗣立 在位十五年 癸亥崩 壽三十二

改元三 永興五 神瑞二 泰常七

世祖太武皇帝名燾明元帝長子以甲子嗣立 在位二十九年 壬辰為宗愛所弑 壽四十五

改元六 始光四 神䴥四 太延五 延和三 太平真君十一 正平二

高宗文成皇帝名濬太武帝嫡孫以壬辰嗣立 在位十

四年乙巳崩壽二十六

改元三

興安三

興光五

和平六

顯祖獻文皇帝名弘文成帝長子以乙巳嗣立
在位七年辛亥禪位於太子宏又五年丙辰崩壽二十三

改元二

天安二

皇興五

高祖孝文皇帝名宏獻文帝太子以辛亥受禪
在位二十九年己卯崩壽三十三

改元三

延興四

承明三

太和二十二

世宗宣武皇帝名恪孝文第二子為皇太子以己卯嗣立
在位十七年乙未崩壽三十三

改元四 景明四 正始四 永平四 延昌四

肅宗孝明皇帝名詡宣武帝第二子以乙未嗣立
在位十四年戊申崩壽十九

改元五 熙平二 神龜二 正光五 孝昌二 武泰三

敬宗孝莊皇帝名子攸彭城王勰第二子封長樂王
明帝崩爾朱榮立之以戊申嗣立三年庚戌誅爾朱榮為

其黨所弑壽二十四

改元一 永安三

節閔帝名恭廣陵惠王羽之子少襲爵爾朱世隆既弑
敬宗迎立之以辛亥嗣立一年壬子高歡廢而弑之壽
二十四

改元一 普嘉

孝武皇帝名修廣平武穆王懷之子封平陽王高歡既
廢節閔奉渤海太守元朗為帝後廢之而立帝以壬子

嗣立三位三年至甲寅西奔長安崩壽二十五

改元一 永熙三

孝靜皇帝名善見清河王亶之世子孝武帝既西入關
高歡奉帝立之為東魏以甲寅嗣立時年十一在位十
七年庚午禪於齊末幾遇害壽二十八

改元四

天平四

元象元

興和四

武定八

文皇帝名寶炬孝文帝之孫京兆王愉之子封南陽王
孝武崩宇文泰立之以甲寅嗣立三位十八年辛未崩

壽四十五

改元一大統十八

廢帝名欽文帝長子以辛未嗣立。在位三年癸酉為宇文泰所廢。尋弑之。壽十六。

不改元

恭皇帝名廓文帝第四子。以甲戌嗣立。三年丙子禪於周。未幾周人殺之。壽二十一。

不改元

右魏十五帝共一百七十一年首丙戌盡丙子

北齊顯祖文宣皇帝渤海穆人姓高氏名洋神武王歡
之次子以庚午受魏禪即皇帝位在位十年己卯崩壽
三十一

改元一 天保十

廢帝名殷文宣太子以己卯嗣立一年庚辰常山王演
廢之而自立尋遇害壽十五

改元一 乾明

孝昭皇帝名演神武第六子以庚辰嗣立一年崩壽二十七

改元一 皇建

世祖武成皇帝名湛神武第九子辛巳嗣立五年乙酉禪位於太子稱太上皇又四年戊子崩壽三十二

改元二 太寧一 河清四

後主名緯武成帝長子以乙酉嗣立即位十三年丁酉為周所滅

改元二 天統五 武平八

右北齊五帝共二十八年首庚午盡丁酉

周閔帝姓宇文氏名覺代郡武川人文王泰之子以丙子受魏禪一年丁丑為晉公護廢而弑之壽十六

不改元

世宗明皇帝名毓文王子晉公護廢閔帝迎立之以丁丑嗣立四年庚辰崩壽二十七

改元二 武定二 武成二

高祖武皇帝名邕文王第四子庚辰嗣立。在位十九年。
戊戌崩。壽三十六。

改元四 保定五 天和六 建德六 宣政二

宣皇帝名贊武帝長子。以戊戌嗣立。己亥傳位太子稱
天元。庚子崩。壽二十二。

改元一大象

靜帝名衍宣帝長子。庚子嗣立。辛丑禪於隋。遇害。壽九
歲。

不改元

右周五帝共二十六年首丙子盡辛丑

隋高祖文皇帝弘農華陰人姓楊氏名堅以辛丑受周禪在位二十四年甲子崩壽六十四

改元二 開皇二十 仁壽四

煬皇帝名廣高祖次子以甲子嗣立在位十三年戊寅無道遇弑壽五十

改元一 大業

恭皇帝名侑煬帝孫元德太子之子唐公李淵入長安
立之以丁丑嗣位戊寅禪於唐封為鄴國公武德二年
崩壽十五

改元一義寧

右隋三帝共三十八年首辛丑盡戊寅

唐高祖神堯大聖大光孝皇帝隴西成紀人姓李氏名
淵以丁丑自太原留守起兵入長安戊寅受隋禪即皇
帝位時年五十三在位九年丙戌傳位於太宗稱太上

皇又十年乙未崩壽七十二

改元一 武德九

太宗文武大聖大廣孝皇帝名世民高祖次子母竇皇
后初封秦王太子建成誅立為皇太子以丙戌嗣立時
年二十九在位二十三年己酉崩壽五十二

改元一 貞觀二十三

高宗天皇大聖大弘孝皇帝名治太宗第九子母長孫
皇后初封晉王太子承乾廢立為皇太子以己酉嗣立

時年二十二在位三十四年癸未崩壽五十六

改元十四

永徽六

顯慶五

龍朔三

麟德二

乾封二

總章二

咸亨四

上元二

儀鳳三

調露元

永隆元

開曜元

永淳元

弘道元

中宗孝和大聖大昭孝皇帝名顯高宗第七子母武皇

后為皇太子癸未嗣立甲申武后廢之後二十二年乙

巳復辟在位五年庚戌為韋后所弑壽五十五

改元三

神龍二

景龍二

唐隆元

武后改元十二

光宅元

垂拱四

永昌元

天授

長壽二

延載元

天冊

萬歲

元 萬歲通天元 神功元 聖歷二 久視元
長安四

睿宗元真大聖大興孝皇帝名旦高宗第八子母武皇
后封豫王武后既廢中宗立之臨朝至庚寅降立為皇
嗣中宗復辟封相王韋后弑逆臨淄王隆基誅之迎立
帝以庚戌即位三年壬子傳位於太子隆基後四年丙
辰崩壽五十五

改元二 景雲二 太極元

玄宗至道大聖大明孝皇帝名隆基睿宗第三子母竇

皇后封臨淄郡王庚戌韋后弑逆以兵討誅之睿宗即位立為皇太子以壬子嗣立時年二十七在位四十四年乙未禪位於太子後七年壬寅崩壽七十八

改元三

先天元

開元二十九

天寶十四

肅宗文明武德大聖大宣孝皇帝名亨玄宗第三子母楊皇后為皇太子丙申嗣立時年四十五在位七年壬寅崩壽五十二

改元四

至德二

乾元二

上元二

寶應元

代宗睿文孝武皇帝名豫肅宗太子母吳皇后以壬寅
嗣立時年三十六在位十八年己未崩壽五十四

改元三 廣德三 永泰二 大歷十二

德宗神武孝文皇帝名适代宗太子母沈皇后以己未
嗣立時年三十八在位二十六年甲申崩壽六十四

改元三 建中四 興元元 貞元二十一

順宗至德弘道大聖大安孝皇帝名誦德宗太子母王
皇后以甲申嗣立一年崩壽四十六

改元一 永貞

憲宗昭文章武大聖至神孝皇帝名純母王皇后順宗
太子以丙戌嗣立時年二十八在位十五年庚子崩壽
四十三

改元一 元和十四

穆宗睿聖文惠孝皇帝名恒憲宗第三子母郭皇后以
庚子嗣立時年二十六在位五年甲辰崩壽三十

改元一 長慶四

敬宗睿武昭愍孝皇帝名湛穆宗長子母王皇后以甲辰嗣立時年十六在位三年丙午為宦官蘇佐明等所弑壽十八

改元一寶歷三

文宗元聖昭獻孝皇帝名昂穆宗第二子母蕭皇后封江王敬宗崩王守澄等迎立之以丙午嗣立時年十八在位十四年庚申崩壽三十二

改元二太和九開成五

武宗至道昭肅孝皇帝名炎穆宗第五子母韋皇后封
穎王文宗崩仇士良等迎立之以庚申嗣立年二十七
在位六年丙寅崩壽三十三

改元一會昌六

宣宗聖武獻文孝皇帝名忱憲宗第十三子母鄭皇后
封光王武宗崩中官迎立之以丙寅嗣立時年三十七
在位十三年己卯崩壽五十

改元一大中十三

懿宗昭聖恭惠孝皇帝名漼宣宗太子母懿皇后以己卯嗣立在位十四年癸巳崩壽四十一

改元一咸通十四

僖宗惠聖恭定孝皇帝名儼懿宗第五子母王皇后立為皇太子以癸巳嗣立時年二十在位十六年戊申崩壽三十六

改元五乾符五

德元

廣明元

中和四

光啟三

文

昭宗聖穆景文孝皇帝名晔懿宗第七子母王皇后封

壽王以戊申嗣立十六年甲子為朱全忠所弑壽三十
八

改元七

龍紀元

大順二

景福二

乾寧四

光

化三

天復三

天祐元

哀皇帝名祝昭宗第九子母何皇后封暉王昭宗遇弑
以甲子嗣立三年丁卯禪於梁明年遇害壽十七

改元盡天祐四年

右唐二十帝共二百九十年首丁丑盡丁卯內武

氏二十二年

後梁太祖神武元聖孝皇帝單州碭山縣人姓朱氏名
晃初名溫賜名全忠以丁卯受唐禪即皇帝位年五十
六在位六年壬申為其子郢王友珪所弑年六十二

改元二 開平四 乾化二

末帝名瑱太祖第三子母張皇后封均王友珪弑逆討
誅之以癸酉嗣立在位十一年癸未唐兵入汴為其下
所弑年三十六

改元三 乾化三 貞明六 龍德二

右後梁二帝共十七年首丁卯盡癸未

後唐莊宗光聖神閔孝皇帝其先沙陀人唐賜姓李氏
名存勗武帝之子以癸未即皇帝位滅梁在位四年丙
戌兵亂中流矢崩壽四十二

改元一 同光四

明宗聖德和武欽孝皇帝代北金鳳城人姓李氏名亶
以丙戌嗣立在位八年癸巳崩壽六十七

改元二 天成四 長興四

愍帝名從厚明宗第三子封宋王癸巳嗣立甲午潞王兵入汴廢之而自立遇害壽二十一

改元一應順二

廢帝名從珂本姓王氏明宗養為子封潞王以甲午廢愍帝即位三年丙申石敬瑭舉兵犯闕帝兵敗自焚死壽五十二

改元一清泰三

右後唐四帝共十四年首癸未盡丙申

後晉高祖聖文章武明德孝皇帝太原汾陽里人姓石氏名敬瑭丙申以北京留守舉兵入洛即皇帝位在位七年壬寅崩壽五十二

改元一天福七

出帝名重貴本高祖從子封齊王以壬寅嗣立在位四年丙午契丹入汴北遷卒於黃龍府壽三十四

改元二天福二開運三

右後晉二帝共十一年首丙申盡丙午

後漢高祖睿文聖武昭肅孝皇帝太原人姓劉氏名嵩
初名知遠契丹入中國以丁未即皇帝位於晉陽繼遷
於汴在位二年戊申崩壽五十四

改元一乾祐二

隱帝名承祐高祖第二子封周王以戊申嗣立三年庚
戌郭威擁兵犯闕遇弒壽二十

右後漢二帝共四年首丁未盡庚戌

後周太祖聖神恭肅文武孝皇帝邢州堯山人姓郭氏

名威辛亥以鄴都留守入汴即皇帝位三年癸丑崩壽
五十一

改元一廣順一

世宗睿武孝文皇帝本姓柴氏名榮太祖養子封晉王
以甲寅嗣立在位六年己未崩

改元一顯德六

恭帝名宗訓世宗子封梁王以己未嗣立庚申禪於宋
後十四年癸酉崩壽二十一

右後周三世共九年首辛亥盡己未

宋太祖英武聖文神德皇帝其先涿郡人皇考始遷洛陽姓趙氏名匡胤父周龍捷左廂都指揮使弘殷追謚宣祖母昭憲杜太后庚申以殿前都點檢受周禪即皇帝位時年三十三在位十七年丙子崩壽五十

改元三

建隆三

乾德五

開寶九

太宗神功聖德文武皇帝名炁初名匡義母昭憲杜太后以丙子嗣立時年三十七在位二十二年丁酉崩壽

五十九

改元五

太平興國八

雍熙四

端拱二

淳化五

至道三

真宗文明章聖元孝皇帝名恒初名元侃太宗第三子
母元德李太后立為皇太子以丁酉嗣立年二十九在
位二十六年壬戌崩壽五十五

改元五

咸平六

景德四

大中祥符九

天禧五

乾興元

仁宗神文聖武明孝皇帝名正初名受益真宗太子母
莊懿李太后以壬戌嗣立時年十二在位四十二年癸

卯崩壽五十四

改元九

天聖九

明道二

景祐四

寶元二

康

定元

慶歷八

皇祐五

至和二

嘉祐

嘉祐

嘉祐

嘉祐

八

英宗獻文肅武宣孝皇帝名曙初名宗寶濮安懿王允讓之子詔立為皇子以癸卯嗣立時年三十三在位五年丁未崩壽三十八

改元一

治平四

神宗英文烈武聖孝皇帝名頊英宗太子母宣仁高皇

后以丁未嗣立時年十九在位十九年乙丑崩壽三十
八

改元二 熙寧十 元豐八

哲宗欽文睿武昭孝皇帝名煦初名傭神宗太子母欽
聖朱太妃以乙丑嗣立時年十歲在位十五年庚辰崩
壽二十五

改元三 元祐八 紹聖四 元符三

徽宗聖文仁德顯孝皇帝名佶神宗第十一子母欽慈

陳太后初封端王哲宗崩以庚辰嗣立年十九歲在位
二十五年乙巳禪位於太子丁未金人陷中原北遷後
九年乙卯崩於五國城壽五十三

改元六

建中靖國元 崇寧五

大觀四

政和七

重和元 宣和七

欽宗恭文順德仁孝皇帝名桓徽宗太子母顯恭王皇
后以乙巳受內禪即位時年二十五二年金人陷中原
丁未北遷後三十四年庚辰崩壽六十一

改元一 靖康二

高宗聖神武文昭仁憲孝皇帝名構徽宗第九子母顯
仁韋太后初封康王金人陷中原二帝北狩以丁未嗣
立於南京時年二十一在位三十六年壬午內禪於太
子又二十五年丁未崩壽八十二

改元二

建炎四

紹興三十二

孝宗哲文神武明聖成孝皇帝名昀初名瑗太祖之裔
高宗以為太子壬午受內禪即位時年三十六在位二
十七年己酉內禪於太子又五年癸丑崩壽六十八

改元三 隆興二 乾道九 淳熙十六

光宗憲仁聖哲慈孝皇帝名惇孝宗第三子母成穆郭
皇后立為太子己酉受內禪時年四十三在位五年甲
寅內禪又六年戊午崩壽五十四

改元一 紹熙五

寧宗仁文哲武恭孝皇帝名擴光宗第二子母慈懿李
皇后立為太子甲寅即位時年二十六在位三十一年
甲申崩壽五十七

改元四 慶元六

嘉泰四

開禧三

嘉定十七

理宗烈文仁武安孝皇帝名昀初名貴誠沂靖惠王之
子寧宗以為皇子甲申嗣立時年二十一在位四十一
年甲子崩壽六十一

改元八

寶慶三

紹定六

端平三

嘉熙四

淳

祐十二

寶祐六

開慶元

景定五

度宗端文明武景孝皇帝名歡福王之子理宗立為太
子甲子嗣立時年二十五在位十一年甲戌崩壽三十
五

改元一咸淳十



文獻通考卷二百五十



總校官庶吉士臣張能照

校對官檢討臣王垣修

謄錄監生臣張泰